

已4

74

醫
略
存
真





醫略存真

怡雲室藏版



光緒戊戌年仲
春月上院開刻

醫畧存真自序

醫居九流之一其小道乎而古之以醫比相者又何其重視醫也非以人之疾病生死所係有不可絲毫苟且者乎漢唐以來諸名家著述具在辨病體論治法以及立方用藥要皆敬慎其事務求精切雖所見不同立言不一如仲景論傷寒繼以劉河間李東垣朱丹溪三家之說各有專主然推闡要義皆能樹立外感內傷可謂症詳而法備矣今時之醫未始不能治病病亦未始不以藥痊而能博覽旁稽深求實學

得前賢之真髓者誰乎而未可執一二成書以治病也天時有寒暑土氣有燥濕稟賦有清濁固自不同而歲運之感南北之異嗜好之殊又自有其偏勝不能適乎中而協於一况歲運相感而今之氣候益薄南北異宜而今之變遷又見嗜好殊尚而今之濫巧尤甚乎嘗見人之負質或偏於陽或偏於陰陰勝則陽微陽勝則陰損陰損則風陽易襲陽微則寒邪易入風陽動寒邪入又每觸於天時之不正土地之不宜飲食之不節嗜慾之不戒而爲之診視者宜從陰

從陽標本兼顧或標寔而本虛者宜寒宜熱尙補尙
攻方藥原宜詳慎尤當審其平日體質之強弱性情
之好尙病之肇於何時受於何地發於何因在氣在
血入經入絡屬臟屬腑舌苔可辨脈理可參一切
按而密勘之庶克有濟然則病無常病藥無常方而
謂拘泥成法漫無變通可乎而又未能捨成法而師
心自用也古人治一病立一方何藥爲君何藥爲佐
君以何藥而能中病之的佐以何藥而能達病之裏
或炒或煨或姜製或酒浸或蜜炙或生切或熟用或

生熟並進孰升孰降孰補孰瀉孰爲攻伐孰爲調和
孰宜辛涼孰宜甘苦孰宜鹹寒酸淡若者養榮若者
和衛若者入於經絡若者通乎臟腑若者治乎三焦
皆幾費經營配合而成大有精意存乎其間。後之學
者必窮究前人用意之所在當臨症之時庶得所取
法焉若第挾偏見妄施方藥則所用不合每至相反
其貽誤匪淺鮮也甚或粗有所得卽自製湯散不但
失乎古法而觀其藥味生湊陋劣令人可駭好奇者
輒據之以爲此方出某名師之所製可以動人聽聞

可以增吾聲價而不知某名師之自用未必能活人而尤而效之者無有不誤人矣嗚呼治醫而無所領悟又好恃已見殆以醫爲戲者詎不大可哀哉軒岐評症原無內外之分何者內傷諸疾皆情慾所鍾元氣先耗繼及臟腑臟腑不和則氣血乖錯不能周行於身而百病見矣瘡瘍之生也六淫傷於外七情擾於中氣血阻滯經脈隧道爲之壅塞有隨感隨發者有積久而發者無論惡症險候卽疥癬之小患無一不由內而達於外前人治病在能得其致病受病之

由故癰痺可以內消癰疽可以內散及破潰之症亦
可以內收何嘗於方脈外另樹一幟乎逮宋元豐間
太醫局設方脈針瘍三科元齊德之爲御藥院外科
太醫著外科精義始有外科之名則內外顯判矣然
旣判之而近來著述諸家每重闡發內科而於外科
輒忽之將以瘡瘍之顯而易明者無資乎脈理耶夫
症別內外紀其名目于有餘條內症居其三外瘍居
其七前哲渾內外而爲一乃探源之治也後之所以
分內外而治者殆以思力不及前哲取其分治易於

奏效。又安見內重而外輕哉。是所望於達道君子勿
執成說而範圍弗過。既求方脈而刀圭益精。斯克盡
運用化裁之妙也乎。余侍先大父治醫十有六年。

觀察脈立方因病製藥辨症之寒熱審寒熱之真假
以及症勢之輕重緩急無不細切而於外科治法凡
手眼所到亦極精當達權通變爲人所難及惜著作
所存甚少庚申紅巾擾境又被毀失今值閒暇追述
指示諸法信筆錄出得論症十六則列於卷首復搜
取數十年來頗稱心得者附之訂爲一冊奈老病日

增手震足乏偶一勞思卽作昏眩所記憶而探入者
無多名曰醫畧存真兒輩請付梓余亦未能憊置有
負先人之苦志云爾

光緒二十二年歲次丁酉清龢月孟河退叟馬文植
培之氏序



醫畧存真凡例

一經旨淵微病機叢禰學者每執偏見悖乎經旨見
病治病鮮有中的余列祖列宗世操是業潛心若
而年問世若而年尙不自滿足可見醫易言而不
易言者也

一自來方書汗牛充棟後人非擇其至精至當依樣
葫蘆并前人之苦心而失之故莫收其驗是刻闡
前人所未備本內經以立言務存精要非敢自炫
具眼者必能鑒之

一凡內診之變幻莫多於痰飲不明其故貽誤非淺
是刻分門別類或抒獨得或摘名言繁約必求其
當亦可爲診家臨時一助云

一世之習醫者每忽外瘍謂無甚精義不知自宋元
豐間設立太醫局卽有三科之名則外瘍尤爲古
今所重可不慎哉

一鷄胸龜背兩症患者甚夥古今方書悉提並論未
析其源醫者值此皆謂正本虧損專于補益故獲
效者罕茲特分其何經指其何因後來學者庶幾

胸有成竹也

一是刻但取經言未詳前哲不道創爲論說未立其
方而治法亦在箇中至數十寒暑所見怪怪奇
之病經駢方案均俟續刊

先大父省三公論症十六則 孫文植謹述

一治癰疽大症須要活變審定內因外感如外感者雖紅腫焮痛斷不可遽下刀插降宜用輕清疎泄之法火毒退腫自消膿自出若用刀過早不獨有血無膿而且火毒撐激腫痛更甚必致滋生他變一大症腐脫新生時最易變動如脈來時大時小爲元氣不續飲食較常兩培爲胃火薰灼後必有變此二端伏於隱微非細心不覺也待至變時則不及矣

醫部全錄卷之八
一發背對口俱要瘡口寬展膿多易出腫自消而腐亦易脫若外口小內腐難出而膿毒過多者卽經所謂腫而不潰因脾弱潰而不斂爲膿饒也後亦不得收功

一潰瘍本忌見血設膿多而稠間出鮮血亦無妨碍惟祇可偶見一二次如膿稀而少腫不退而血出多者後必有變

一治癰疽大症第一要身體輕便症勢雖大步履轉動如常者十中可保七八如症勢尙輕行動皆屬

勉強後必有變

一治大症大便不妨微溏小水切不可短數如小解數而不多者斷難收功腦疽尤忌肺腎氣敗之兆也

一治大症脈象未潰前要洪大然洪大而重按空者亦忌細小軟弱不宜

一癰疽大症潰膿之後一夕忽見音低此腎氣先敗亦必有變

一疔瘡瘡頂平塌脈細小者斷不能作膿必致內陷